

Ivo Andrić za početnike

U junu 2012. godine Milorad Dodik je napisao jedan tekst povodom otkrivanja spomenika Ivi Andriću u Višegradu. U tom tekstu on kaže „Ko god se ozbiljno bavi pitanjima Bosne u Hercegovine i politikom mora izučiti poruke iz književnog opusa Andrića“, a onda je istakao je da je umjetnost nobelovca Ive Andrića prepoznata na svjetskom nivou i da su njegova djela najbolja za objašnjenje, ne samo prošlosti, nego i sadašnjosti i odnosa u BiH. Na kraju je priznao da kad god ima priliku pročita određene segmente, onoga što je Andrić napisao (prim. aut.) da bi lakše objasnio život u BiH.

Voli Milorad Dodik da citira Ivu Andrića a jedan od omiljenih citata mu je onaj

„Kada uđete u BiH prestaje logika“

To je spomenuo neki dan, [24. avgusta](#), pokušavajući da nam objasni neka neslaganja unutar Predsjedništva Bosne i Hercegovine.

I nije samo neki dan već i svih prethodnih godina, kada treba Srbima, Hrvatima, Bošnjacima i Ostalima da objasni u kakvoj državi žive.

Pa dobro Puhalo u čemu je problem?

Pa problem je što tu misao nikada nije izgovorio Ivo Andrić.

Evo, ponudiću 1000 KM, ko mi pokaže i dokaže da je ovu rečenicu napisao ili kazao Ivo Andrić.

U redu, ko zna odakle je Milorad Dodik pokupio ovaj citat, ali ono ga vješto koristi da bi pokazao da je Bosna i Hercegovina nelogična država, a samim tim i neodrživa, što njegovu politiku onda čini konstruktivnom i jedinom ispravnom.

Iako imamo dva filozofska fakulteta u Republici Srpskoj, sa katedrama za srpski jezik, niko nije našao za shodno da ukaže na neznanje našeg predsjednika i zloupotrebu Andrića u političke svrhe.

Znam sad ćete vi reći da je ova izjava sigurno promakla našim andrićevcima sa fakulteta, ali to kao što rekoh ranije, Milorad Dodik izjavljuje od 2019. godine, a možda i ranije.

Biće da se od silnog, naučnog rada, ne stižu baviti dnevnom politikom.

Opet, ko može bolje da poznaje život i djelo ovog pisca od Milorada Dodika, koji je bio spreman da „skrši“ preko 20 miliona KM u grad posvećen ovom piscu, ko može da dovede u pitanje njegovu stručnost?